

12

ceperit ab iis, qui ab initio et spectatores harum rerum fuerint et administratores, Luc. I, 3.

Ex his ita praefectis efficitur, librorum N. T. auctoribus, ea, quae litteris erant relaturi, tum, *cum scriberent*, non esse demum a Deo reuelata. Quis enim vñquam et quibusnam argumentis probare poterit, Deum reuelasse Matthaeo, historiam vitae Iesu scripturo, notitiam earum rerum, quibus ipse intererat, quas viderat, quas in recenti memoria tenebat? Iesus ipse, pro sapientia sua in docendo vbiuis conspicua, accurate separauit a reuelatione veritatum antea discipulis incognitarum Ioh. XVI, 13. 14. meram directionem, seu spiritus s. operationem eam, qua siebat, vt dictorum ipsius reminiscerentur, Ioh. XIV, 26. Mandatum e. c. dederat Iesus Apostolis, omnibus notum: aqua vt lustrarent omnes gentes, nomine patris, filii et spiritus sancti. Hoc nouae religionis fundamentum, per Christum constitutum, cum litteris exprimere vellet Mattheus, numne opus fuit, vt Deus ipsi notum redderet, seu reuelaret, quae nunquam memoria exciderant? — Quid igitur Deus in auctorum sacrorum animis eo ipso tempore, cum ad scribendum se conferrent et opus coeptum elaborarent, fecisse putandus est? — Cum, qui finem vult, is et media voluisse censendus sit; iusta ratione inde colligi poterit, Deum, qui, ope verbi sui, in auctorum sacrorum libris consignati, hominum animos vi et efficacia veritatis emendare, ad omnem virtutem formare et ad beatam vitam et sempiternam felicitatem praeparare constituerat, omnia fecisse, quae ad hunc finem consequendum essent necessaria; cauisse igitur, ne horum librorum auctores ad scribendum feligerent *incertas res* et fabulas inanes, quarum magna copia tum temporis circumferebatur; prospexisse, ne verbis vterentur rerum grauitati non congruis; fecisse, vt rite et accurate reminiscerentur earum rerum, quarum forte essent oblii; direxisse denique eosdem, vt litteris consignarent omnia veritati et ipsius decreto et voluntati consentanea *). *Qua autem ratione* Deus

*) De argumentis, librorum s. theopneustiam comprobantibus, alio loco differendum est.